

Zeitschrift: Schwyzerlüt : Zyttschrift für üsi schwyzerische Mundarte
Band: 10 (1948)
Heft: 7-9

Artikel: Schwyzerlüt
Autor: Rieder, Adolph
DOI: <https://doi.org/10.5169/seals-182079>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 30.03.2025

ETH-Bibliothek Zürich, E-Periodica, <https://www.e-periodica.ch>

Schwyzerlüt

Schwyzerlüt

Mir Schwyzerlüt sind gwirig Lüt;
Mer wüssed is nu zwehre,
Kei Arbed won is nüd wohl lyt.
Und wäns is eis ä Fasnacht git,
Wie chömmer is erst chehre!
Hei jupedihee im Schwyzerland!
Äs Glesli wemmer fülle!
's Handörgeli chunt au derzue
Und tuet äs Tänzli trülle.

Mer hend au nüever Wyberlüt;
Sind mögiger als neime.
Wie d Blueme uf em Pfeisterbritt,
So zeuked's eim wie Ankebrüt.
Drum isch sä schön däheime.
Hei jupedihee im Schwyzerland!
Mer lönd is zue dr Gspuse.
Mer zündet eis äs Pfyfli a
Und lönd's vorusse pfuse.

Meinrad Lienert. „Us Härz und Heimed“
Verlag H. Sauerländer & Co., Aarau

Schwyzer (1915)

(Ibergerisch)

Sind miär nu urchi Schwyzerlüt,
Eifach i Wort und Rust?
Hend miär im Härz nu Dörfli hüt,
Hert Chnöde i dr Fust?
Frymänge hed äs fröndlachts Tue
I Sprach und Chleiderlappe.
Glych, 's lyd am Fueß und nid am Schueh,
Am Chopf, nid a dr Chappe.

Sind miär nu alti Schwyzerart?
Vil Frönds chund üs dur d Tür.
Glych, simmers nümme all am Bart,
Se simmers innévür.
Im Schwyzerbärgland wachst ruchs Holz;
Mi darfs äs Bitzli bschnyde.
Was schadt das üsem Schwyzerstolz?
Das, das mags verlyde.

Hend miär nu Fräid am Schwyzerbund?
Haarus, mer wend em bstah!
Fry simmer, dilegued und gsund,
Und zäme wemmer ha.
Und was's au um is ume gid,
Mer land is nid verwybe.
Sind miär nu Schwyzer alder nid?
Mer sinds, so wemmers blybe.

Meinrad Lienert. Us „SchwäbelPfyfli III“
Verlag H. Sauerländer & Co., Aarau

Ad Jungschwyzer

Witt du ä gfreute Schwyzer sy,
Und innévür wie ussevür, —
Gah stolz am Geßlerhuet verby.
Und was d für rächt häst, wäg em a!
Und innévür wie ussevür, —
Mueßt ruch derdur, da chunst guet a.
Ä Schwyzer söll dä Stürme bstoh,
Und innévür wie ussevür, —
Sä macht ers syne Bärge no.
Nu bherr di äbe sälber guet,
Und innévür wie ussevür, —
Sä fählt dr nie dr redli Muet.
Und zeig au Härz für ander Lüt,
Und innévür wie ussevür, —
Lue, wies dr dä schöins Wätter git!
Au blyb mer bscheide, gohts dr rächt,
Und innévür wie ussevür, —
I alle dienstig, keim ä Chnächt.
Bis fröili, ohni Helgeschy, —
Und innévür wie ussevür, —
Sä häst im Alter alls wie nü.

Meinrad Lienert. Us „Härz und Heimed“
Verlag H. Sauerländer & Co., Aarau

Schwyzerlüt

Ja! Schwyzerlüt, das wei m'r blybe,
Wo s'Schicksal üs au ane treit;
Im Spräche. Handle — gar im Schrybe
We 's mügli ischt. u 's dir no geit! —
Mir wei di Mitwält la erfahre,
Was Schwyzer-Treu' u Chraft verma,
I Friedeszyte wi i G'fahre,
Gäng zäme halte, Ma für Ma!

Mir wei im glyche Sinn hie walte,
Das Erbstück gäng in Ehre ha
U was etfrömdet use schalte,
Vo dere G'sinnig nie la ga! —
Dä Schwyzergeischt nie la erschlafe
U pflege üsi Muettersprach,
Aes hindert nüd, was ihr mög't schaffe
Na Bärnerbruch, nähmt's langsam g'mach.

So „Schwyzerlüt“ mög'st all' erfreue,
Di üb'rem Meer, — i frömdem Land,
Dä Schwyzergeischt i G'müeter streue,
Wo fesslet a das Heimatland! —
I wünsch dir Glück uf all'ne Wäge
U daß di Mission dir g'lingt,
Das Schwyzerdütsch zu neuem Läbe
U zu gebührender Ehrung bringt.

Adolph Rieder USA (1941)